

153.—HE TANGI MO TANA TAMAITI,

Na Mokai.

(Tuhoe.)

Na Te Whatu o Tuhoe i hoatu nga kupu, nga whakamarama ki a Te Peehi, tuhia ai e tera ki tana pukapuka, B.3/58.

(Ref.: B. 3/58).

Kaore taku raru ko au nei anake,
Whakapuke nui tonu e te roimata,
Whakatoka rahi tonu e te hinengaro.
Kai hea aku hoa nana i homai,
I kite ai au i nga puke taumutu
O Maungatoroire,¹ kia whakarongo
Ko te tangi a te tai whakaharuru ana, e,
O te mata tahuna o Waikaraka?²
Ka mutu pea nga rangi mihi atu
Ki a Te Akakura,³ ka wehe atu na i ahau.
Ka huri te wairua nga piko wai
O Te Murimuri,⁴ kia tangi atu au.

¹Maungatoroire:—He maunga kei Whakatane.

²Waikaraka:—He awa.

³Te Akakura:—He wahine,

⁴Te Murimuri:—He awa.

154.—HE WAIATA WHAIAIPO,

Na Waipu.

(Ngati-Hinemanu, Ngai-te-Upokoiri).

Na Te Taite Te Tomo nga kupu, nga whakamarama.

He wahine rangatira a Waipu no era hapu no Ngati-Hinemanu, no Ngai-te-Upokoiri, he wahine ataahua rawa hoki. Ka whai te wahine ra ki a Te Perohuka, he rangatira no Ngati-Whiti, no Ngati-Tama o Patea. Kaore ia i paingia ma taua tane, ka tangohia e ona tungaane ka mauria ki Paetawa, ki to ratau kainga, whakamoea tonutia atu ki te tane, ko Ihaka. Ko Hanara te uri.

(Taite 56, B. 3/67).

Purei kohu e whakatoro ra,
Tahere ana mai te puke ki Okahu;¹
Kei tua atu hoki te tane²
E aroha nei au.
Naku ia na koe i whakarere
I te aiotanga,³
‘Tahi te waka nei ka rutua,
Paea ki te akau, i.